



Kamis, 20 Desember 2021
Ogen: Matius 25:1-13



Ersikaplah!



Nande Jileken tading i Medan, bas wari natal e reh turangna ras edana i kuta nari. Enggo ndekah kal maka ia lanai pernah jumpa ras turangna si sada e, e maka dauh-dauh nari enggo ersikap ia. Tukurna peraboten si mbaru, janah bas wari kerehen turangna e, tasakenna nurung kerah ras jambe. Sabap ingetna e me pangan favorit turang kekelengen. Ise pe la berena ngkuit gulen e, asa reh turangna ndai. E maka kenca seh turang nd Jileken enda ndai, minter sikap kal pengalo-ngalona, berena man. Meriah kal ukur turangna ndai erkiteken persikapen si ibahan Nd Jileken. Megah kal akapna sabap arah persikapenna e icidahkenna kehamaten ras kekelengenna man turangna.

Jelma manusia saja pe megah akapna adina siban persikapenta ngalo-ngalo ia ku bas jabunta. Uga nge kita i bas ngalo-ngalo Tuhan Jesus e? Kai nge si jadi persikapenta. Persikapen fisik perlu, bagi mpesikap jabu, nukur baju baru. Tapi si la kalah perlu, si la banci tading e me kap persikapen pusuhta. Uga dage ninta i bas mpesikap pusuh e ngalo-ngalo Tuhan e, biak si uga nge si ngena ateNa maka meriah ukurNa bengket ku bas geluhta?

Si pemena, kebadian geluhta ntah pe kerohanianta. Bas ogenta iandingken lit 5 singuda-nguda pentar ras 5 bodoh. Singuda-nguda identic ras badia, bersih denga. E maka i bas ngalo-ngalo Tuhan, si utama kal e me jaga kebadian ukur, pusuh ras perbahanenta. Si peduaken, pentar dingen metenget. Pentar i bas ngaturken kegeluhen, la lit upah melantar. Pepulung gundari nari kiniulin geluh, inget maka e nge pagi si baba mulihkan jumpa ras Tuhan. Si terakhir, nggeluh bas pertobatan tep-tep wari, sabap la si eteh ndigan warina Tuhan reh. Asa bancina sanga kerehenNa sikap min kita nggeluh ntah mate gia tetap kinitekenta man Tuhan saja.